



先叅政公行狀

五

先公姓王氏諱叔杲字陽德號暘谷王之先  
出本瑯琊晉時居山陰者起家江東唐大理  
少卿公諱從德徙台之黃巖宋末萬十一翁  
諱惠由台徙永嘉世居華蓋鄉英橋里四傳  
爲樵雲公諱毓雅聲詩所著有槐陰集樵雲  
公七子四爲平五公諱珙生時齋公諱封時  
齋公生溪橋公諱鉦以仲子祭酒公諱激貴  
封中憲大夫通政使司右通政有碩德祀于

社溪橋公生東厓公諱澈累官福建布政使  
司左叅議贈朝議大夫配潘氏封宜人贈恭  
人東厓公年四十餘未舉子恭人嘗夜禱于  
天得異夢已而生伯父憲使公諱叔果越歲  
生公公在襁褓偉晬異常兒七歲就外傳受  
書輒成誦十二歲從長公習禮記卽善舉子  
業嘉靖庚寅東厓公官兵部郎攜公暨長公  
如京師就學時江右聶雙江公名豹爲吳郡守  
素善東厓公一見公奇之聶爲講大學古木

及良知之說公輒會其旨台宗人石梁公名度

與東厓公爲同舍郎其子伯祚少聰慧能文

公與同學間取騷選子史讀而搦管爲詩賦

從祖祭酒公見而心異焉謂東厓公曰此兒

有遠志他日必以古文詞名者時從翰林編

修文溪盧公名淮授經邸舍而學日起甲午潘

恭人卒于京邸公侍東厓公奉差護襯歸葬

半山公同長公廬于墓側旦夕展泣痛稍定

攻習課業丙申華亭徐文貞公名階督學試公

補郡諸生已按院冷塘周公

名汝

與前後郡

公每試冠多士時東厓公致政林居義先敦睦命公取舊宗譜重爲修輯譜成請東厓公告祠會族旅食序次秩如也又請擇地於英橋里建始祖祠務以收族規制宏敞悉公所區畫公性博洽自經史外如山經地志星曆堪輿之書靡不旁闡藏脩暇游覽泉石凡遇名勝輒屬意焉嘗過陽湖目其地四山迴礴三溪注匯遂購爲別業癸卯以禮經薦于鄉

解元爲山陰沈公東雅以意氣自負與公深相結長公先於庚子鄉舉公同上春官下第歸仍入山綴文討古意夷然也乙巳溫郡荐饑公虞吾土蓋藏已罄請東厓公發所貯粟就宗祠施粥待餓者凡兩月活數千人丁未從長公游南雍會永康程文恭公名文德爲祭酒泰和歐陽文莊公名德爲太常卿器公伯仲延與論學意深許可公時偕諸名士游金陵勝蹟多有著作名動一時尋歸齋使者鄢公

按部諮求鹽法利弊公條請築沙城鄆公允其議行之城成竈氓多利賴焉長公庚戌成進士公以東厓公年近耄留侍養不赴踰歲東厓公考終時長公以使事復

命公哀慟治喪惟謹廼瘠骨立服除棲遲塚舍乙卯先妣吳恭人卒公際計偕欲無徃以長公謁選強同北上丙辰試罷歸會倭寇擾海上從祖寺丞仁山公與族父少卿東華公聚鄉兵計防禦寇果遯去鄉族咸易之謂倭無

能爲公獨虞之曰敵少幸耳夫兵不固營壘爲戰守計危道也莫若相度築堡城聚守爲萬全策衆聞以爲迂戊午倭復大至薄郡城掠鄉村萬室焚如仁山公東華公相繼死事鄉族懼蕩析咸智公追前議請築堡公許力任之時長公官職方疏于

朝報可公遂相地據險度費庀工簡衆董其事堡成樓櫓森嚴望之爲巨鎮而防守之法漸備鄉族賴以乂安費凡七千餘金強半爲公

所輸堡工甫竣寇突至衆藉以無虞公復通衢浚河重葺大宗祠置義田義倉舉東厓公所立族約率衆敦行之不使煩于有司仍著築堡紀畧爲世考云公酷好山水與族兄煦益究心堪輿家說於諸名勝廢墜不惜捐金修葺嘗憩息其間以長公方入仕乃身肩鄉族事無意制科凡兩輟計偕躬歷艱勤所居墨池里鄰華蓋山太玉洞天傍麓治玉介園窮臺池泉石之勝日攀友人徜徉以自娛兵

憲洋山凌公

名雲翼

動輒延公廉訪時事甚器

重公間語公曰君致力鄉井得矣然負經濟畧當世非踐制科雖才媿伊呂無所用君宜努力公領之辛酉秋從兄光蘊領鄉薦公因同上春官壬戌登進士時相嚴分宜賄亂朝政中外洶洶

廷試命策問安內攘外事公條對多詆時政甚拂相意置三甲出身先是公鄉舉榜首梅岡沈公以科臣建言語侵分宜被逮繫獄公念

之家居及計偕每訊問不輟分宜父子敗公  
訪沈公配張夫人於長安寓舍代草疏上之  
詞甚懇激謁大司寇蔡峯黃公請爲題覆

世廟覽疏感動立釋之癸亥授常州靖江令靖  
環江爲邑阻而陋爲盜賊淵藪稱彫敝難治  
公至拊以寬惠梗者繩以法不爲鉤摘劇刻  
而民胥懾服興文教捐俸重建儒學絃誦之  
士彬彬嚮風邑馬馱沙有東西朱二族以貲  
雄咸爲仇家誣中論坐久不白公廉其枉爲

白郡守監司俱得釋靖之民歡呼加額曰吾  
屬可安堵矣他政化類如此未朞而邑大治  
爲諸郡最兩臺以卓異聞調宰常熟靖民數  
百人詣闕乞留不得公下車簿領稍定首謁  
子游祠見其祠圯甚憮然歎曰江左文學祖  
於言公而邑無專祀可乎遂建文學書院置  
田以供祭及贍諸生會課之需邑有豪右故  
侍御某多匿巨盜行劫公立發其奸無所避  
萑苻爲之肅清興利釐弊一無所徇諸若折

譚照寃獄緝錢氏奴姦黨丈田地豁糧長織  
悉靡不具舉甫暮當道以課最薦遂膺

內召乙丑補兵部車駕司主事時楊襄毅公名博

爲冢宰趙劔門公名炳然爲大司馬

世廟不安節命公巡守長安兩門已傳

世廟賓天

莊皇帝從裕邸迎入大內是晚傳旨欲倣

毅皇帝升遐故事設兵九門防守趙公令亟陳

軍容公白趙公曰

武宗時

肅皇帝在楚邸大寶久虛陳兵固宜

今上已入內庭旦夕登極遽陳兵似駭觀視力

請罷之

莊皇帝御宇改元隆慶丁卯公領詔宣諭山

東及兩直隸便道爲東歸計適浙省例應一

二人入銓曹擬留公補之公曰生平不欲妄

覬且業已請差而中輟人將謂我何遂戒行

旣抵家間增治陽湖別墅爲菟裘計已而北

上復 命轉職方司員外郎時邊防廢弛公

疏薦兩廣總督二華譚公名繼總兵南塘戚公

光宜調北邊預防虜患 旨下允之戚議

募練南兵數萬以備虜凡廩餼歲給不貲皆

公從中調覆而邊務以脩

上大閱以公調度有方 賜鏹幣尋晉武選協

司郎中察曹胥奸狀與正郎環洲吳公名允極

力振刷往各邊報績檄撫按稽覈進冊曹胥

肆為沉匿請託關說取世襲若掇公忿其虛

冒覈實具題濫法悉屏已巳晉本司正郎公

益留心選法部籍載武職父祖功勳及陞襲

條例以年久溷落遂題請重修著為令即權

勢不得少撓時有錦衣衛帶銜千戶徽人葉

先春機警而力饒投事近侍李芳入 裕邸

供書適

莊皇帝御極錄從龍功冒銜寅緣求管事公曰

錦衣帶銜不許預事

祖宗制也一旦壞之可乎爭之益力雖奧援不

恤也正德間故大司馬伍公

名文定

以前剪宸濠

功廕一子錦衣衛千戶其孫子率爲諸生取

科名比一孫始告襲前廕兵侍郎新蔡曹公

名

以年久例不許襲公曰例不許者懼功次

不明也伍之功紀冊可考奚例焉卽上疏謂

王守仁之功非伍無以成其始孫許之節非

伍無以成其終三臣之後旣加優敘文定之

裔豈可不錄曹公覽疏歎服遂爲覆襲公在

選司閱兩歲功罪稽核陞襲因革一持以法

權貴人不敢干是歲公以考滿報績膺封典

庚午出守大名府名士饒民朴公蒞以清靜

主於休養視學謂郡文教不振首捐鍰重建

元城書院制極雄麗州邑諸學宮咸以次修

舉會吳興吳公欽爲長垣教諭公延之書院

遴諸庠士子之雋者若干人肄業其中政暇

躬課文第其高下文體士習翕然一新才品

彬彬稱盛如南樂魏公允貞允中兄弟長垣

李公化龍東明李公民質元城陳公廉董公

復亨內黃劉公光祚黃公吉士凡十數輩皆  
公所期屬者相繼取魏科樹勛烈於當世時  
稱公爲知人魏俗多負氣公申行鄉約保甲  
之法獎善懲暴士民率爲孚化田賦征輸不  
均里役賠賾困累爲編賦役冊著成規郡苦  
馬地餘銀積逋數十萬懇當道題請得蠲免  
驛站加派民困剝膚力爭報罷守郡凡三載  
專務德化治行爲兩河冠每休暇不廢吟咏  
於廳事側闢地作堂榭爲退息所做宋韓魏

公治郡故事榜曰晚香堂夾道槐檜叢鬱庭  
下多種黃花間集青衿輩論學其中忘其身  
之在官也癸酉晉湖廣按察司副使整飭蘇

松常鎮兵備暫歸休沐隨按吳時島夷竊發

海上戒嚴公同總兵黃公名應甲巡視諸隘地

策勵四郡將士授以方畧會巡撫都御史陽

山宋公名儀望初任諮公以海防漕運凡十餘

事擘畫若指諸掌多所施行又虞兵政久弛

沿江自圖山至白茆福山延袤八百里金山

曰柘林青村吳淞曰川沙南匯江陰曰楊舍  
太倉曰劉家河凡險隘悉閱歷整備先後條  
議總二十五事靡不當於機宜如築堡城以  
扼守寶山不閱歲而成督儲餉從漕計報完  
而士不枵腹設兵分水陸要害使首尾相應  
造沙艦則務堅厚高廣而別設三翼輕舸以  
翊之製火器較射步爲法悉備而尤急於選  
將江應晴陳習朱先輩勇敢多智畧公拔之  
介胄中朱方坐罪當戍以公出其誣委力效  
功卒爲名將諸材官亦感激思奮乙亥倭船  
若干艘犯內地公發超距士禦之盡殲其衆  
嚴戒將卒獲被虜者毋妄殺悉俘以報已而  
得數百人閩越相半盡慰釋以歸 朝議紀  
錄晉秩湖廣布政使司右叅政仍留鎮三吳  
先是四郡扣弓兵民壯銀四萬餘兩解京助  
邊而吳中軍需不支民賦又難加派公謂江  
南爲 國家根本地留都陵寢在焉較邊防  
孰重爲書上政府請留前銀給餉疏上 許

之吳賦累歲多積逋奉

旨帶徵郡邑徬徨逮繫瘦死者相枕籍會大司

徒石汀殷公

名正茂

拜計部過吳公馳白殷公

曰吳財賦居天下之半歲輸已不堪必帶徵  
民無噍類矣今幸公爲計相敢爲吳民請命  
俾得 俞旨蠲免使人人知

主上德意殷公領之旣入京言之政府以聞奉  
聖諭蠲免舊逋吳人賴以安者公力也時督糧  
叅政缺一切漕政水利經畧悉以屬公乃徧

歷河港深窮源委疏濬利導之法著爲書詳  
具三吳水利考比歲春大雪河水堅盈尺凡  
七月不雨河盡涸漕舟數千艘盡膠淺於潤  
州道中諸當事者以誓期虞策無所出公計  
集田間水車數百乘分部吏人晝夜輶湖水  
以益之三日運河大溢不半月漕舟一一如  
期出京口過淮無留者衆鼓頌驚以爲神尋  
仍開孟河濬練湖百餘里以濟轉輸撫臺雅  
齋胡公名執禮特疏首薦公又吳頻歲旱澇在

在告褻徵科苦不集公因攝糧儲事爲議漕  
餉改折謂明有六利陰去四害爲上下便胡  
公是其議卽疏請時戶科給事中石公名應嶽  
意左叅公難於轉餉假此以自文且以漕艘  
稽故法論坐鑄秩胡公爲疏辨公誣峻甚又  
追論先時鹽徒傷劫不禁政府直公坐改調  
別用公聞報歎曰而夕郎者出我於叢脞鞅  
掌之藪還我九斗二雁誠德我哉遂飄然東  
歸是歲丁丑臘繼太母張恭人年七十八公與

長公稱觴上壽集宗黨姻戚故老相慰勞甚  
歡長公時鄉居公頻相過從談笑寢處無間  
月益脩明前所行族約以舉義爲事而自悔  
投傳之晚也初公之坐論也政府爲慰留公  
求去益力政府知公意堅不能強居無何就  
家補福建布政使司右叅政公業已絕意仕  
路適居張恭人內艱迨除服江陵欲任公屬  
所知勸駕公曰我方懼濡足要津奈何申脰  
以就之耶遂堅臥不應日過陽湖玉介覩昔

所手植松檜榆柳拱者抱抱蔭數牛蒼蔚林  
林矣乃復加飭治增斥區宇樓榭池館之勝  
遂甲于郡時從父鴻臚後橋公諱叔本亦謝  
簿政歸從公同妙解音律集小史數輩歲時  
伏臘及花晨月夕邀長公與俱集賓友爲高  
會命小史曼聲奏舞公性不耐酒必令善醕  
醕者累觥已而命題相賡和不甲夜不休海  
內名流聞者咸豔言其勝太倉鳳洲王公世貞  
吳興鹿門茅公坤建業漪園焦公竝各爲記

郡學宮日就傾圯科目屢弗利諸生數請於  
有司以時絀不舉隨詣公以告公許諾力任  
改創往學門南向巽吉山晉郭璞築塔其杪  
爲文筆嘉靖初毀於颶風公首爲重建學前  
民居湫隘泮池淤塞爲售居闢地疏池注泉  
堂廡齋舍一一鼎新出橐金凡千餘不煩有  
司一醵也自是歷科魁名輩出事具太史京  
山李公名維記中公雖席世貲豐殷而不事  
藏殖疏財樂施不啻饑渴所在名山勝蹟咸

藉以新若東山孤嶼僊巖東甌王廟鎮寧樓  
鎮東塔先後創葺所費金各以百千計又若  
築塘埭修道塗建橋梁施棺槨里旅疏戚待  
而舉火待而寧宇枉待而申訟待而析者日  
交集於前公應之無迁色無拒辭徐爲之理  
務人人意慊而後已公孝友天植每上大父  
母塚及忌祭必悲涕若孺子慕事長公篤愛  
敬自少迨老友于之誼藹然一日也生平志  
識博大機鑑弘朗多負經濟畧每策天下大

計凡九邊之險阨軍政之張弛方輿之形勢

水利之通塞以及食貨戶口平準沿革之籍

靡不心究指畫所與諸公卿若本菴楊公俊民

中陽舒公應龍衛陽周公世選每有所論質公輒

立應皆鑿鑿中時弊監司及部使者干旄必

式公廬諮以境土事宜及民所疾苦公悉爲

剖析決筴咸歎服而去懸車二十餘載身先

鄉井事振窮拯急闔澤恩厚沾被於閭里宗

親者不爲不溥而公歆然自挹意有所不可

不以親故溺誠有所必矜卽怨悔不爲沮而  
鑑照策應不俟終日則人人警服也曩江陵  
當軸知公最深公治兵三吳江陵言之時要  
婁婁多所獎掖或語公宜馳啓候公恬然若  
不聞也者及家居復託聲勉公出竟無所報  
謝海內識者以此益多公公居嘗蚤起盥櫛  
已獨坐靜室望之儼然卽之藹然間進子弟  
及諸孫經義爲訓詁譚說遇風日和暢率子  
姪賓朋輩過園亭登陟周覽時一課灌花澆

竹乃以東甌諸勝地編爲樂府新聲命僮子  
歌之興至拉同志郊游操畫舫載鼓吹遠近  
惟適於佳勝輒留信宿任意流行從客或告  
疲公神益王望之者皆謂神僊中人公少善  
臨池晚年以目疾廢去歲己亥公春秋八十  
三耳目益聰明步履益矯捷落齒復生白髮  
轉鬢能於篝燈作蠅頭書每宴集必首倡爲  
詩歌越日繕寫以詒同好卽累數十紙弗勸  
也衆方期公年未艾是歲庚子春三月公與

吾母陳恭人誕辰日舉酒燕客公康勝逾甚  
四月命舟徧覽陽湖岷岡孤嶼僊巖永寧山  
諸勝歸數日遂寢疾初謂體中小惡耳久之  
病亟而神明炯炯如常時及將殆召美與二  
子諄諄以孝義爲言母墜先訓爲戒已而目  
暝時萬曆二十八年庚子五月二十三日未  
時也嗚呼痛哉嗚呼痛哉距生正德十二年  
丁丑三月十七日寅時享年八十四所著有  
玉介園藏稿二十卷公博極羣書於堪輿家  
言尤所深究往守天雄改學宮而科第盛發  
備兵太倉移建鐘樓於巽方而王士騏陸大  
成王衡輩相繼發解又築錫山塔而孫公繼  
臯大魁及第吾鄉改府庠而科名亦響應他  
如品隲諸地興廢咸若射覆而手下玄宮於  
陽湖時引賓客讌游其上則曠達自適也美  
將卜歲日舉襄事元配吳氏贈恭人繼配陳  
氏封恭人咸以內德稱子男一光美光祿寺  
大官丞女一適章恭毅公裔孫郡庠生章一

畿孫男二至直至京俱郡庠生孫女五長適  
太學生林承鐘次適庠生梁玄衷三適陳都  
督公裔孫指揮應襲之煒四許字吳進士子  
明登五許字章文學子至寧曾孫男欽瑞公  
卒甫三月兩庠士上其行于督學洪公名啓睿  
檄郡縣祀鄉賢光美以明年襄大事深懼先  
德日湮莫能貽令乃含哀擴拾實紀爲狀而  
祈不朽于  
大賢君子伏惟

俯垂采擇賜之一言豈惟錫光逝者而美子  
孫佩服

明德將世世弗替孤子光美泣血百拜謹狀

叅岳王公傳

公王姓諱叔杲字陽德別號暘谷居士先世  
晉居山陰唐宋而還一徙台再徙永嘉遂爲  
永嘉人七傳而生溪橋公鉦溪橋公子左叅  
議澈國子祭酒澈爲最貴叅議公有叔配曰  
潘宜人初舉憲副公叔果次卽公公生而警  
敏異常兒十二通戴氏禮工制義旁及騷選  
子史祭酒公見而大器之曰此吾家千里駒  
也數歲故徐文貞公以學使者至試而奇之

補郡諸生學益闕肆卽醫巫星曆輿地之書  
靡不揅討癸卯登鄉書明年下第歸益明習  
天下大計凡疆場士馬屯田水利以及食貨  
戶口之籍一一若指諸掌乙巳郡大禩公佐  
叅議公出粟哺餓者存活數千人齎直指諮  
齎法于公公請築沙城捍氓竈至今賴之倭  
變起海上公聚族而謀計在築堡衆聞以爲  
迂尋寇以無備突入邑幾爲墟遂大服公議  
而公亦力任之堡成樓櫓相望邑恃以無恐  
費幾七千餘金強半解公橐中裝也公一意  
色養累謝計偕不往居恒廣叅議公意立宗  
祠置義田舉族約敦行之不少怠叅議公旣  
逝乃勉起舉壬戌進士筮仕靖江令尋調常  
熟靖江水四合姦盜出沒訐訟蝟起公爲經  
理振刷之而邑大治常熟巖邑也公至首修  
言公祠以造士而邑某侍御者數大盜而收  
其入勢張甚公立發其姦狴犴之風稱寃者  
公又立出之邑亦大治臺察以最聞遷兵部

車駕王事會

世廟賓天

莊皇帝從裕邸入大內矣是夕有欲倣正德末年設兵九門者公力爭之曰

武宗時

肅皇帝在楚大寶虛也乃陳兵以備

今上已入內而何以此重駭士民爲乃報罷尋轉職方員外郎公念邊事廢弛力薦總督譚公總兵戚公當召入防虜患時戚募南兵數

萬歲出不貲公從中調護一時邊備大飭

上大閱有金幣之賜再晉武選郎中一切胥史

姦婦之若洗部籍載諸武臣功與承襲條格

歲久磨滅公題請重修而葉先春者挾奧援

欲以帶銜署衛事公以例斥之伍司馬定濠

亂予蔭一子部侍郎難其久不許公曰例久

不許者慮功未明也豈功如伍公者而有不

明耶力爭之敘於錦衣其強力守官皆此類

久之出守大名大名土沃俗醇公壹以無事

相煦沫而間修禮文以風之葺元城書院延  
碩師以教一時諸士響臻後多顯重者如魏  
解元允中中丞允貞李司馬化龍不減十數  
輩畿輔文學爲之一變公力也癸酉

命以湖省憲副鎮三吳方島夷內訌公閱江延  
袤八百里各相其險隘而厚爲備精簡郡邑  
良家子程其騎射中勇智軼衆如江應晴陳  
習朱先輩拔之行伍中人人感奮一日寇以  
百艘至所練士分道搏戰而公提尺一如意

揮之遂大破敵所俘斬甚夥且獲被虜者數  
百人

朝議紀錄晉右叅政仍留鎮吳吳賦累歲多積  
逋時有帶徵之議逮繫死者相藉會大司徒  
殷公道吳公馳白之曰江南財賦半天下歲  
輸業不支而益之帶徵如吾民何殷公蒞事  
竟除其議而吳民乃稍稍蘇矣是時督糧叅  
政缺公兼治之爲開孟河濬練湖爲轉輸計  
語具三吳水利考比歲七月不雨潤州行千

艘皆膠不可以漕公令集田間水車輓湖水灌之三日而河溢不淹時自京口達于淮衆推以爲神無何論折徵事起蓋公條六利四害語甚辨而省郎不謂是也疏論公坐改他用公竟歸或勸之出而曰吾曩在公車屢謝計偕者以吾親也豈吾官若干年而倍母以出邪歲餘部以閩臬起公友人有傳江陵相意勸駕者公堅卧不爲動迨時相敗而人益多公之先見云公所居有陽湖別墅玉介園擅一方之勝歸而益爲修葺山池花木臚整幽靚晨夕偕兄弟賓客置酒高會酒酣自度曲爲新聲授童子令按節奏之歌聲舄影相間錯於巒容川色間驩如也性嗜義樂施其大者如郡學東山孤嶼僊巘東甌王廟鎮寧樓鎮東塔先後創葺歲所損不啻數百千緡至若飢待而食疾待而療歿待而殮訟待而理者日集於前公應之畧無忤色人人得所望以去公起家名進士三典郡縣奏課第一

佐本兵叅大藩歸而爲德於鄉不可縷數蓋  
所至尊以賢大夫而不敢名卒之日年八十  
有四春秋高矣而學士薦紳猶惜其材而未  
竟用與年而未竟享也則公之爲人足以觀  
矣所著有玉介園稿二十卷子一人光美以  
一文學世其家

史氏曰公之兩舉沈給諫東與朱職方潤身  
其厚善者也給諫困詔獄公橐餽之間無虛  
歲卒賴其力以脫死而職方以旅襯歸也公  
提兵吳會貴倨矣乃微行至金陵經紀其喪  
素車白馬哀感行路余嘗親見之士當平居  
意得指心自結一遇利害死生輒獸駭而鳥  
散如公褻誠秉忠誼形於色非夫浮華蒞利  
之徒所能規也語云一死一生乃知交情信  
夫

賜進士及第翰林院修撰儒林郎直

起居注 國史 講筵官瑯琊焦竑撰

明大中大夫福建布政使司左叅政賜谷

王公墓誌銘

王之系出瑯琊晉居山陰唐徙黃巖宋徙永嘉其里曰英橋四傳爲樵雲公毓能詩又三傳爲通政公鉦鉦生子祭酒公激叅議公澈澈子憲副公果叅政公杲杲字陽德所謂賜谷先生者也叅議公年踰四十無子元配潘宜人禱于神得吉夢生憲副公踰歲復生公公有異稟少從憲副公受禮經敏悟絕倫叅

言金  
議公攜之官司馬聶公豹宗人兵部公度竒  
其才所習自舉子業外騷選子史含咀其英  
華而出之爲詩賦叅議公見而悅之遣從太  
史盧公淮學學日進遂爲郡諸生徐文貞公  
所識拔也叅議公謝事家居好行其德修族  
譜建祖祠發廩賑饑公皆佐筴癸卯舉于鄉  
領解者山陰沈公東一見爲莫逆交游南雍  
程文恭公歐陽文莊公深器之久之倭夷入  
犯公從諸父寺丞公諸弟少卿公集鄉人爲  
兵勢甚張倭不敢逼衆謂易與耳公獨搖首  
曰必築城聚守乃可言安衆多口難與慮始  
又三年倭復來寺丞少卿死于難衆乃服公  
先見而憲副公官職方疏請築城報可公身  
爲植計費萬金出公橐者半城成而倭復來  
卒不能以一矢相加遺也公當偕計以城故  
兩輟不赴而從子郡丞公舉於鄉公挈以行  
遂登進士沈公爲給事中直言得罪繫獄十  
許年公家居數存問不絕至是代其配張夫

人爲疏請釋夫罪

肅皇帝覽之惻然由此得解已授常州之靖江  
令靖江故江中洲耳爲盜賊逋逃藪公拊循  
赤犢而徐以法繩諸爲奸利者不嚴而治有  
東西朱兩家貲皆雄里中因相仇怨立爲理  
出任卹如故而又新學宮督課諸生諸生斌  
斌興起兩臺言邑小不足煩公請調之常熟  
靖江民詣闕乞留不得首至謁子游祠祠圯  
撤而新之而更建文學書院置田若干供歲  
時享祀及諸生都養費邑某子甲官侍御多  
納亡命摘發無所避邑人歡呼載路他善政  
不勝書 召入爲兵部車駕主事大司馬蒲  
阪楊公劔州趙公世所推名臣事每咨決公  
而行

肅皇帝崩

穆皇帝從裕邸入受遺

詔有

旨如

毅皇帝故事陳兵九門公言

毅皇帝晏駕

肅皇帝遠在楚陳兵固當今

上已居大內旦夕勸進登大寶陳兵何爲者遂  
罷旣改元公領

詔宣諭山東南直隸便還家上冢而越適缺銓  
郎人言公可小留公曰君言不宿於家遂行  
已遷職方司員外郎疏薦譚襄敏公太保戚  
公宜調北邊而戚公募練南兵數萬公從中

酌兵食便利一一施用之

上大閱京營以公稱姪有方賜金幣尋晉武選  
協司郎中已晉正郎覈武職世系功勳吏胥  
無得高下其手令丙錦衣衛寄銜者無與衛  
事千戶葉先春貧緣中貴人執事

裕邸以從龍恩希管事公持不可故大司馬伍  
公以翦宸濠功任子錦衣千戶其子孫皆文  
學取科名至孫始請襲或以年久遠不許公  
曰所不宜許者功次不實耳王新建之功非

伍公孰爲始孫許之節非伍公孰爲終此灼  
然在人耳目三公賞延于世何得不錄伍公  
大司馬如公議已出守大名大名士沃而民  
愿公鎮之以無名之樸而建元城書院簡十  
邑士之雋者數十百人以經師肄習之若御  
史大夫李公御史中丞魏公兄弟咸出其門  
經術節義後先相望大名由此爲天下望國  
已行鄉約保甲法化民之羯羠者蠲馬地銀  
積逋平亭賦額輕重適中于今民賴其賜焉

凡三年遷湖廣按察副使備兵蘇松常鎮四  
郡公故習吳事事咄嗟辦白上海防運道利  
害凡十餘條而身沿江自圖山至白茆福山  
凡八百里得金山之柘林青村吳淞之川沙  
南滙江陰之楊舍太倉之劉家河浚隍崇城  
增兵列戍首尾相應造沙船別爲三翼輕舸  
助之製諸火器較射步法匠心獨運纖悉畢  
備倭來寇公率衆禦之奪其舟下令無濫殺  
得聞越人遭倭患者數百人遣歸朝議嘉公

功晉右叅政仍鎮四郡如故已請留弓兵民壯銀四萬金請蠲積逋數十萬而采漕政所宜興廢著書曰三吳水利考吳人奉爲挈令春大雪河水盈尺漕艘膠潤州無算公計集民間水車輓河水以益之漕途遠又開孟河濬練湖百餘里又議漕粟當改折明有六利而陰去四害胡中丞韙之具疏以聞而省臣疑公是不任漕姑以自委耳効公得調公聞之欣然卽日命駕歸當其少時爲別業陽湖

四山三溪所會也城居墨池里鄰華蓋山太玉洞天則構玉介園池臺泉石之勝甲于郡歸而謂友人是物真爲吾有矣黃門公使我釋重負而遂初服吾甚德之政府廉公才不宜在草野卽家以故官起福建所知勸駕公辭不拜命或謂卽不拜命宜致書謝政府公曰計之熟矣令附執政而得官何待今日亦何至有黃門浮言也復增治兩園奉憲副公及從弟鴻臚公叔本微時所等夷親知置酒

高會鴻臚公解音律公爲小令度新聲以佐  
酒籃輿畫舫嬌歌急管申旦不寐以爲常里  
人望而豔之若仙監司部使者于旄羔鴈數  
過公就問國家大計若方輿形勢九邊阨塞  
軍實屯政食貨戶口鹽筴水利疊疊中窾會  
無不灑然動色充然滿志也其於堪輿家言  
尤極精詣郡學之南吉山故有浮圖號文筆  
毀於颶風爲復還舊觀而廟堂黌舍亦歲久  
不治治咸堅好更市民間地疏池注泉有司  
病物力屈損公橐金踰千不知于色太倉無  
錫科第多元魁談者率推公樓塔功里中名  
勝若東山孤嶼僊巖東甌王廟鎮寧樓鎮東  
塔先後膳治費不貲而于先世丘墓封樹彌  
謹未弱冠喪母潘恭人同憲副公廬半山之  
墓早夜哭甚哀比喪父亦如之旣歸田而繼  
母張恭人尚無恙公年與之亞身上食問寢  
不令女奴代也憲副公理尚棲約門無雜賓  
而公日不廢絲竹客常滿座憲副公殊不爲

忤其喪兄也不減父若母孝友廉讓信于妻  
子而式于鄉人德宇寬裕人無貴賤賢愚卽  
之溫然非義相干不徇不拂而默使人意消  
築塘除道成梁饑予粟寒予衣沒予棺三黨  
之外歲不下千人日雞鳴起盥櫛或子弟諸  
孫執經問難或課家僮灌園或召客出游或  
過從親知終日應接無須吏暇強有力者欠  
伸跛踣而公神益王每燕集首倡爲詩屬座  
客和之春秋八十四矣噉果餌如壯夫耳目  
之官不衰却杖而步燈下作蠅頭書是年伯  
孫爲學使者所錄高等仲孫補博士弟子員  
值公與陳恭人生日舉酒燕客客倍於昔公  
酬酢倍勤四月命舟歷覽郭外諸勝歸數日  
寢疾不起與子孫訣惟母忘孝義先訓而已  
是爲萬曆庚子五月二十有三日其生則正  
德丁丑三月十有七日葬于陽湖所自卜也  
不佞楨受公知久武林之除深以密邇公爲  
幸而公遽已矣公子季中以墓誌相屬屬坐

不稱職左官媿負公國士之遇強而具草其  
言無文其事無溢美也男子一人光美卽季  
中大官丞孫男子二人至直至京俱諸生不  
忝烏衣門風女子一人爲章恭毅公裔孫諸  
生一畿婦孫女子五人太學生林承鐘諸生  
梁玄衷指揮使陳之煒吳孝廉子明登章文  
學子至寧其壻也曾孫男子一人欽瑞公卒  
之兩月督學使者以兩庠諸生及郡邑諸有  
司請祀公于學宮所著玉介園稿二十五卷  
藏於家其倣儻環瑋經營大畧與風流標致  
差可覩焉銘曰

東甌左海百谷王粘天浴日貨笏唐偉哉王  
公受厥祥以表東海風泱泱爲令爲守稱循  
良出爲藩臬入爲郎文經武緯何不臧豈必  
用行舍卽藏八十餘年多居鄉畏壘之民穰  
庚桑通耶介耶道何常我欲名之名無方天  
錫純嘏壽且康子孫逢吉世青箱春秋饗祀  
國上庠大知大年得全昌東海之樂大相當

萬物一齊孰短長豪末丘山地秣穰無憂楸  
栢實公良海若與公魂翱翔

賜進士出身嘉議大夫浙江按察司按察使前  
江西河南四川布政使司左右叅政奉

敕督學陝西按察司副使翰林院修撰編修  
國史官南新市人李維楨謨

明大中大夫福建布政使司左叅政賜谷

王公神道碑銘

王氏肇始瑯琊晉居山陰唐徙台宋徙溫其  
里曰英橋四傳爲詩人毓又三傳爲通政公  
鉦鉦生祭酒公激叅議公澈澈子長叔果官  
憲副仲子卽公名叔杲字陽德賜谷其別號  
也初叅議年四十無子與潘宜人禱於神而  
生二子公生有異稟越常兒十二通禮經工  
佔俾笏及百氏爲詩賦有驚人語故徐文貞

公爲學使者拔置諸生學益闋博凡星曆方  
輿諸家言論靡不搜討癸卯登鄉書偕計下  
第歸閉戶讀書益明集古今條貫國家表裏  
議論踔厲風發常屈一坐乙巳郡大稜公出  
粟飼餒人存活數千指齏使咨齏法于公公  
請築沙城捍岷竈至今永賴倭寇繹騷公團  
伍于鄉自保倭少却公曰盍堡諸否則孤注  
耳議格于譁者未幾寇突入邑幾墟邑人遂  
大服公議已條上報可公身爲植費幾七千  
緡出公橐中裝幾半比儲胥成而寇至卒不  
能以一矢相加遺也公一意色養兼以城故  
兩輟偕計已叅議公逝乃勉起舉嘉靖壬戌  
進士給事中沈束以諫繫詔獄公爲具橐饋  
者十餘歲至是其配張孺人上疏公爲之地  
上意解竟得釋拜靖江令靖江水四合盜藪其  
中白晝大編橫行界內有急藉豪貴爲解吏  
不能破柱取也公捕其魁繩以法散解羣黨  
而一切用寬大拊循赤犢已大治當道才公

調常熟公至首修言公祠更建書院置義田  
供諸生某侍御者數大盜而享其賕至鉅萬  
公摘發其姦窮治無所貸自是萑符遂絕  
召入爲兵部車駕主事會

肅皇帝棄羣臣

莊皇帝從裕邸入大內矣有請循故事陳兵九

門公曰

肅皇帝龍飛自楚邸陳兵備非常固當

今上不離斧扆何用紛紛動羽林也遂罷已公

領

詔宣諭齊魯吳越還家上冢有謂公小留須改

銓部公曰奈何以競要地宿王言也遂行尋

轉職方員外疏薦兩廣總督譚綸總兵戚繼

光宜調北邊時戚募南兵數萬公爲借箸策

兵食皆允行上大閱賜公鏹幣晉武選郎

中武選胥史多姦利公爬搔弊竇殆盡錦衣

千戶葉先春挾奧援欲希從龍恩署衛事公

以帶銜無署例持不可故大司馬伍文定以

定濠功任子錦衣子從經生業未乞至孫始  
乞堂卿難其久不許公曰例杜久者慮功冒  
也功如伍且舟楫孫許而嚆矢新建孰慮冒  
也卒如公議已出守大名大名民愿少文公  
一以安和相煦沫而間修禮樂文其風建元  
城書院延雋士肄習士蒸蒸起一時名臣如  
魏中丞允貞兄弟李司馬化龍輩咸出其中  
大名遂爲望國癸酉遷湖廣按察司副使飭  
蘇松四郡兵政公故習倭情悉吳事所條列  
咸中肯歎吳兵素怯公曰此糜卒耳玩而不  
震何以當緩急乃簡壯士部伍之教以陣法  
及騎射一軍遂精又身沿江自圖山至白茆  
福山相其險隘城障兵戍首尾相應造沙船  
佐以三翼輕舸制諸火器皆省費使用一日  
寇以百艘至公發所練士分道搏戰而身提  
尺一如意揮之遂大破敵効首虜數百奪其  
舟悉遣閩越人被脅者朝議嘉公晉右叅政  
仍留鎮吳吳多逋賦時議帶徵逮繫死者相

藉會大司徒殷公正茂道吳公馳白之曰江南歲輸什取五六業不支而益之帶徵如溝壑吾民何殷入公言及蒞事盡蠲積逋數十萬吳民稍稍脫水火矣公又采漕政所宜興廢著水利考至今爲挈令比值久旱糧艘膠潤州不能漕公令集田間水車澗湖水灌之三日漕遂通又開孟湖濬練河百餘里無何論折徵事起公條六利四害語甚辨而科臣石應嶽謂公不任漕借以自委劾公得調公聞之欣然曰黃門豈仇我乎奪我孟門太行而與我鴈山華頂其嘉惠不淺卽日歸歲餘起閩泉不應公所居墨池里有玉介園倚華蓋山太玉洞天其別墅爲陽湖四山三溪所會也公歸而益爲修葺位置臚整幽靚鬱紆公晨夕偕兄弟賓客往游自度新曲佐酒輕盞小舸歌聲鳥影時夷猶于曉嵐夕照柳烟竹月間人望見以爲神仙也監司部使者數就公咨問時事公談論麇麇中窾會無不灑

然得意去生平孝友絕人弱冠喪母廬半山  
陽朝暮與泣哀感窮人比喪父如之旣歸田  
事繼母喪家人上食問寢惟謹不令女奴待  
也事寡嗣兄如父比喪輟絲竹終喪不替親  
黨間所爲飽饑療疾埋齒築阡與夫婚嫁鬪  
訟竭力無難色至如修建郡學及東山孤塚  
僦巖東甌王廟鎮寧樓鎮東塔先後所損所  
堵不啻數百千緡素與朱職方潤身厚善嘗  
提兵吳會時職方旅觀歸金陵公微行徃逆  
經紀其喪傾橐而返徃歲遭鬱攸先世所遺  
殆盡不爲攢眉徐令除瓦礫去煨燼鳩工更  
作不踰時而復還舊觀人以是服公器度才  
局當江陵柄國賢重公甚公不爲狐媚纖趨  
及吳下婁江相繼爲政皆與公同年莫逆而  
書問絕不一通嘗曰何能以腐鼠故奪我考  
槃此其恬退耿介鴻飛鳳舉超然于人間夷  
險成虧好醜稱譏之外豈易及哉公没于庚  
子五月二十三日其生則正德丁丑三月十

七日葬于陽湖所自卜也友人李本寧憲長  
旣已誌其墓而季中復以神道碑相屬念公  
曾鎮我吳余亦分節甌括相知最深其何敢  
辭謹采志傳中所關鉅者爲之紀載無溢美  
也公子一人光美卽季中大官丞有詩名孫  
男子二人至直至京俱諸生女子一人爲章  
恭毅公裔孫諸生一畿婦孫女子五人太學  
生林承鐘諸生梁玄衷指揮使陳之煒吳孝  
廉子明登章文學子至寧其壻也曾孫男子

一人欽瑞所著玉介園稿二十五卷藏於家  
風流幹畧差可觀焉銘曰

甌海無垠巨彼大荒欽月吐日以成文章瑯  
琊有王於茲發祥龍鳳虎豹奕世爲光偉哉  
我公克紹青廂出則良令入則望郎分符魏  
郡懋著循良言鎮我吳舊刃新霜南金燁燁  
賁彼星芒庶厥膚溫如執誼堅剛飼者嬰孺磔  
者梟狼甲兵精曜桑敷奮張議與時左拂衣  
高齋歛厥經綸與世頽唐遺智餘力尚摧扶

桑仁耕義種爲德於鄉山墅水居翠沃雲翔  
絲語竹鳴引羽流商胡必有官我樂相當胡  
必有民我澤汪汪鴻飛天表贈繳無妨思儀  
其羽羅者弗忘掉頭不顧自老蒼茫惟公弘  
宇德備圓方翦棘剖籬城府堂堂中行獨立  
萬夫所望僥得三事疇爲物傷僥得上壽疇  
爲神攘陰而不雨荃而不芳真宰謂何誰識  
其常陽湖流碧鴈山飛蒼公乘白龍其神倘  
祥大風泱泱後福穰穰子子孫孫百世無疆  
賜進士出身嘉議大夫浙江按察司按察使前  
浙江布政使司右叅政分守溫處道奉兩  
敕提督學校四川貴州按察司副使通家舊治  
生馮時可頓首拜撰

福建叅政暘谷王公墓表

世廟之季釋登客長安是時永嘉王公郎駕部  
有聲江南名士從之如雲因朱在明識公于  
京邸圖書滿案花竹紛列每捉麈對客談非  
名山水卽異人勝事未嘗以猥言俗義挂齒  
頗望之有天際真人想亡何公出守魏郡寓  
書來索晚香亭榜稱魏地饒黃花太守政暇  
日坐亭上挹寒香攬秋色咏韓魏公詩以當  
高山仰止而已又亡何擢湖廣按察司副使

奉

璽書備兵三吳吳有雕龍士若而人無不長裾  
刺促曳門下是時瑯琊太原兄弟名籍甚婁  
水公適鎮其地園林鐘鼓之宴無虛日婁人  
又善種菊公官衙所稅菊悉異種圖經所不  
載菊價繇此遂高無論晚香矣公雖以文采  
風流著稱乃其吏事又最善初成進士授常  
州靖江令靖江孤懸絕島魚龍之國地不當  
一彈丸而其人多佩刀劔善操舟橫江爲盜  
白晝殺人高浪中急則倚大豪爲藪令不能  
破柱取也公捕其魁寘之法而一切用寬大  
爲政然後民相戒無敢蹈三尺靖江知有令  
自公始當道上公治狀稍遷常熟常熟言公  
桑梓也祠屋圯壞不能設鐘簾公建書院置  
祭田羣子弟之俊異者于其中躬自課之於  
是絃歌禮樂之化大行邑有枉後惠文大俠  
也匿諸惡黨爲奸盜邏者莫敢窺其門公首  
發其罪綠林輩一時屏息

召入爲兵部車駕司主事值

世廟棄羣臣

莊皇帝入繼大統大司馬欲循故事陳軍容防  
守九門公爭曰 康陵厭代

肅皇自楚邸龍飛安得不陳兵備非常

今上已入內廷旦夕登 大寶何事虎賁羽林  
之卒紛紛駭觀聽也遂止隆慶改元之歲奉  
詔山東南北兩都諸郡縣便道歸復

命補職方司員外疏薦兩廣總督譚公綸總兵

戚公繼光宜調北邊禦虜 旨皆允行

上大閱賜鏹幣晉武選司郎中覈功賞嚴陞襲  
爬搔吏弊濫竿者不得容錦衣千戶葉先春  
以帶銜冒 裕邸從龍功求管衛事公云錦  
衣帶銜不預事舊制也請如令甲不許大司  
馬伍公文定以擒宸濠功廕一子錦衣衛千  
戶子未乞廕孫始乞之主者以年遠例不許  
襲公疏論逆濠侵敗王畧 社稷幾危賴王  
守仁之功與孫許之節而後定然所以始終

之者皆伍力也今三臣並荷賞延文定後人  
寧可不錄報聞伍竟襲矣出守大名大名故  
魏地號儉陜詩人所賦葛屨履霜者也其俗  
朴而少文公乃修學宮創元城書院召長垣  
吳廣文以功令帥諸生諸生爭自力于文去  
爲名卿巨儒者甚衆如南樂二魏長垣東明  
二李元城則陳與董內黃則劉與黃皆其表  
表者耶時以公化俗視文翁人倫視郭林宗  
矣去郡雖久人見晚香亭輒思公不減峴山  
片石也兵備吳中日兵政漕政並弛公條刺  
防海三十餘事督餉十餘事成鑿鑿見施行  
倭犯內地遣露撓戈船銳卒出海禦之殲其  
酋釋其被虜者以功加叅政秩備兵三吳如  
故上書政府請留兵壯銀四萬餘兩爲軍興  
免加派宥江南累歲積逋免帶徵

天子先後下詔蠲免公此舉功不在周文襄况  
太守下科臣石應嶽以吹毛論公當改調公  
欣然命駕曰黃門知我乎俾我獲老鴈山華

頂間德不貲矣公既歸而故所治別墅鳴湖  
玉介者悉幽窅鬱紆擅丘壑之美手所種樹  
大者蔽牛其次巢鶴小者亦鳴蟬矣益斥治  
池館臺榭朱廓碧檻與清流嘉木相映帶若  
仙都洞府然平泉金谷無論也時江陵相雅  
知公欲加援引卽家補官福建叅政公堅卧  
不起日與棋酒客出游山墅拍浮竟日公府  
請謁絕不與聞或星軺玉節幸臨時一報謝  
而已少好讀書尚氣節負經世之畧尤耽賞

泉石游覽不倦恬於仕進視榮名勢利泊如  
也家本世族自祭酒公以來奕葉金紫宗黨  
賓客固非當世賢豪長者相與夾持砥礪而  
勲德日盛性喜青烏郭璞之術有所建置如  
築城堡改學校建書院治居第營別墅樹浮  
圖望景觀卜向背建破一一取堪輿氏言而  
所至皆有奇驗生而風度凝遠汪然穆然莫  
窺其際卒遇變故臨利害屹立不動往歲鬱  
攸之警凡先世所遺帑藏蓄積圖書金石鐘

鼎尊壘之屬一朝化爲烏有公無所何問徐  
令除瓦礫去煨燼鳩工聚財復還舊觀勿俾  
宗廟宮室黍離麥秀乎人以是知公未易測  
也嗚呼當江陵柄政日氷山峨峨趨者如市  
公旣爲其所知稍能枉尺卽三事九列皆可  
立致乃考槃在阿掉臂不顧斯非所謂鴻飛  
冥冥者哉王之先蓋出瑯琊本山陰人其徙  
永嘉自宋季萬十一翁始公名叔杲字陽德  
別號暘谷年八十有四所著玉介園稿二十  
五卷子一曰光美光祿丞有詩名永嘉詩人  
自康裕卿而後指不可勝僂近乃有何無咎  
才行甚高皆布衣窮巷之夫公禮爲上客待  
以忘年而後悉成名士非夫太史公所云附  
青雲而聲施後世者哉公令靖江日脫朱在  
明于網羅爲兵使者或造飛語中釋登公亦  
陰解之兩人期終身以國士報公在明往歲  
猶能一過陽湖奉公杖屨釋登兀兀老牖下  
不獲拜公牀下問起居公今逝矣上不能追

延陵挂劍之義下不能踵南州磨鏡之風光  
祿君乃不遺管蒯遠索雕蟲之詞以辱羸羸  
嗚呼慚負知已能不腹痛

治民太原王穉登拜手謹誤

鄉賢呈勘稿

溫州府永嘉縣兩儒學廩增附生員葉世芳  
虞應節周子恭蔣治朱仕林汝梅薛繼祿劉  
炤等呈爲表舉鄉賢以勵風教事竊見故福  
建布政使司左叅政王叔杲隸籍浙東溫州  
永嘉起家嘉靖壬戌進士性資端毅德器宏  
深師父友兄經術本淵源之漸存心制行志  
向惟賢聖之趨蚤預計偕雅旨康濟值僑夷  
寇擾瀕海築義堡捍衛鄉閭首事斥私囊萬

餘竣役罷公車再上甫強登第愈勵官箴筮  
仕靖江而調繁常熟

榮召旋膺入參兵署而出守大名

褒旌疊至載陟蘇松憲臬尤張保障雄風歷考  
宦業始終具見真儒作用釐奸剔蠹利澤遍  
洽兵民課稅橫經化誨聿孚髦俊文學暨元  
城書院道盛當時太倉及魏郡生祠名流萬  
禩閩叅復起壯心不挫於權津

朝命屢辭高節獨標於

聖世捐貲新學序可追文正高踪申約飭宗祊  
儼爾藍田懿範鎮寧鎮東舫樓閣壯鹿城形  
勝費金各逾千緡義田義廩割膏腴贍梓里  
貧寒舉火奚翅三族闔門養重望閭息爭忠  
愛惓惓雖畎畝不忘

天子研窮矻矻卽耄耄何異書生生平所著甚  
多玉介猶存遺稿詩文簡雋體裁漢唐議辨  
精微根宗濂洛總歸實用豈曰空譚開園避  
塵俗之于處室絕姬姜之勝閭脩弗慙衾影

素念可質鬼神卓哉昭代完人允矣

累朝遺老從容觀化神全易簣之時壽考令終  
論定蓋棺之後伏思鄉賢重舉

國制最嚴必出處無玷

宮墻斯崇報有光俎豆惟本官清操純德夙達  
邦家宦籍鄉評共推山斗善難詳述狀可槩  
聞伏乞念甌越遠殞大賢更祈爲學校永昭  
盛典豈惟增輝

聖祀抑且激勵士風誠輿論之不敢阿亦義舉  
之不容緩也爲此具呈

溫州府永嘉縣儒學廩增附生員陳忠誠項  
國禎柯榮等遵依會同府學廩增附生員林  
良棟黃嘉孰葉國華等從公查勘得已故鄉  
宦福建布政使司左叅政王叔杲由嘉靖四  
十一年進士歷任靖江常熟知縣行取授兵  
部職方司主事歷武選司郎中陞北直隸大  
名府知府陞湖廣按察司副使整飭蘇松常  
鎮兵備加銜湖廣布政使司叅政爲議時事

見忤當道辭歸復起福建布政使司左叅政  
撫按屢有薦舉力辭不起林居二十餘年萬  
曆二十八年考終正寢士林痛悼追惟宦蹟  
鄉評共舉鄉賢今覆勘本官學窮性命行質  
神明孝友旣篤於承家廉幹尤勤於報

國由少壯而大耄藻脩動準古人歷令守而監  
司匡濟率根經術難進易退之節粹白無瑕  
興賢造士之心始終不倦宰常熟則表章言  
氏祠以大興文學于南方典大名則特劾元

城館以廣士風于北地卽其爲郎爲憲無  
非此志此旨急義猶私脩文若渴故濟濟舉  
鬣奮激而彬彬俊彥登庸雖養靜于家園甚  
汪心于鄉校值郡庠圯廢踰十數年捐私橐  
經營度千餘兩濬池闢路導引風氣之祥審  
勢面方協應堪輿之吉維中衷之文運致聯  
掇之科名益其仕也助

朝廷弘教化宛同蜀郡之文翁迨其歸也爲鄉  
梓振英才何讓蘇臺之文正大作

宮墻羽翼弘收

聖代薪樞壹切媿行嘉言總堪書於汗竹所在  
鴻猷駿績夙具載於豐碑諸生景仰高風服  
膺雅訓哲人倏逝方深梁木之悲道範猶存  
共議瞽宗之祭稽公評於衆口定確論於清  
流宜列鄉賢永光祀典事真義舉好豈私阿  
覆結是實

署永嘉縣事本府推官朱

勘得已故福建

一布政使司叅政王叔果宅心正大制行光明

體用實深契於通儒淵源本夙承於家學初  
今虞仲故邑首崇言偃賢祠至若政事之科

無忝神明之治出典魏郡益著芳聲百廢聿

興十庠具葺羣生徒於書塾割俸緩爲供需

陋時習務掇其菁葩探理窟直窮乎根底是

以及門多士蔚爲當代宗工尸祝千秋允矣

名邦師表勲庸不懋於秉憲經濟稍愧乎設

施遂勇退於急流足範型其賢俗堅辭

徵命寧論疏廣之懸車力建黌宮有類希文之

讓宅匪獨覃恩民社是皆有功

聖門他如築堡以奠鄉邦置田以贍疏戚在家  
垂懿範於月日筮仕布清問於陽秋所宜崇  
德報功以光俎豆者也

溫州府知府林

勘得已故鄉宦王叔果家

傳世德學本通儒歷官緯武經文兩生祠之  
豐碑可按素行強仁慕義六庠士之清議尤  
彰築堡護鄉閭能捍大災而垂奕世捐金新  
郡序克開昌運而啓後人卓矣昭代之名賢  
展也儒林之碩彥旣經該縣覆勘明確允宜  
崇祀以光俎豆

溫處兵巡道湯

批王宦偉抱宏猷高風碩

德真足以繫人心而垂不朽匪直一鄉之善  
士已也允宜崇祀學宮以光俎豆仰候

提學道詳示行繳

提學道洪

批王先生學本淵源行有坊表

具經文緯武之畧樹廉頑起懦之風誦義無  
窮好脩彌篤月日之譽最永俎豆之典宜隆

如議置王禮送入府賢祠繳

祀鄉賢文

萬曆庚子歲冬十二月望日甲申溫州府知府林繼衡同知陳禹謨通判王錫命彭創基推官朱道相謹以牲帛之儀致祭于

明故大中大夫福建布政使司左叅政賜谷翁王老先生之靈 詞曰

夫崇祀礪世聖之教也嚴舉曠典國之憲也樂成闕誼有司之職也衡覩公型範想公遺風承檄憲使用會儒紳祀公於黌肅之以文

曰惟公中和天性詩禮代承文章理學蚤擅  
賢聲筮仕以後諸所爲牧政之最績憲度之  
威稜橫經而課稅繕學以儲英宦成尸祝行  
紀家乘誠 昭代之著蔡承學之儀刑卓哉  
懿行蓋僂指其難竟也顧品士一鄉必悉苻  
乎鄉議陪祀

至聖詎無功於

聖門公也師友伯兄則正學之養遂祇諧繼母  
則至孝之譽聞訓嚴胤嗣寵絕姬姜卽呂藍  
田其何讓義急州閭惠周宗族非范文正誰  
與倫其尤挺拔流俗者氣忤權臣官辭棟國  
恬退林泉優游晨夕衆之所重任力必先義  
之所關傾財不惜巍巍文廟公實修之屹屹  
鄉堡公實築之至今俎豆濟楚保障崢嶸揆  
厥所由伊誰之功且其著述若林蔚然大雅  
楚騷宋理當今綦寡生平意氣以興起斯文  
爲已任扶翊聖功于弗替所宜晉之宮墻而  
罔媿者也薦列明禋永昭令德億萬斯年德

馨無忒

萬曆庚子歲冬十二月望日甲申溫州府署  
永嘉縣事推官通家晚生朱道相謹以牲帛  
之儀致祭于

明故大中大夫福建布政使司左叅政暘谷翁  
王老先生之靈 詞曰

繫大羅之龍蓂兮吐精苻而降祥鍾靈淑於  
我公兮洵清廟之圭璋懷金玉之瑩晬兮昭  
雲漢而爲章承家學之洪源兮咀菁華而綯  
七襄乘海運而鵬搏兮蚤蜚英於巖廊初剖  
竹於靖江兮軫天隱其如傷嗣調繁於海虞  
兮噓郅屋以春陽歷鳴琴於兩邑兮霈湛露  
之灑灑迨出守於陽平兮邁龔黃之循良垂  
愛景以撫字兮咸尸祝於無疆

帝嘉卓異而寵遷兮爰鎮憲於吳會念韜戈之  
日久兮振戎事於凋敝克張皇於六師兮允  
外捍而內衛鬯威稜於海漕兮羗風行而雷  
厲當時宰之棟衡兮啗美爵而弗嗜雖

帝眷之方殷兮甘辭榮而恬退臨墨池以著作  
今汎陽湖而卒歲進造福於蒸氓兮退流芳  
於榆社新黌序於圯壤兮揮千金而弗計振  
族屬以義田兮兼築堡以爲蔽彼出處之殊  
途兮曾何物之弗濟鏡我公之芳躅兮直與  
范希文而相儷余承乏爲理兮挹喆人之光  
霽日月忽其不淹兮駕玉虬而僊逝列鄉賢  
以崇報兮固羣情之所契咎伯氏之崇祀兮  
仰高標之罔媿兮二難之接踵兮欣明德之  
媿美稽輿論而僉同兮宜蒸嘗之孔惠謹禱  
牲而陳詞兮垂風教於百世

外學

四

國



